

Toja

I.

Quan chai la fuelha
dels aussors entresims,
e·l freg s?erguelha
don seca·l vais e·l vims
dels dous refrims
au sordezir la bruelha,
mas ieu soi prims
d?amor, qui que s?en tuelha.

II.

Tot quant es gela,
mas ieu non puesc frezir,
qu?Amors novela
mi fa·l cor reverdir;
non dei fremir
qu?Amors mi cuebr?e·m cela
e·m fai tenir
ma valor e·m capdela.

III.

Bona es vida
pus ioia la mante,
que tals n?escrida
cui ges no vai tan be;
no sai de re
coreillar m?escarida
que per ma fe
del mielhs ai ma partida.

IV.

De drudaria
no·m sai de re blasmar,
qu?autrui paria
torn ieu en reirazar;
ges ab sa par
no sai doblar m?amia,
qu?una non par
que secondada no·ill sia.

V.

No vuelh s?assemble
mos cors ab autr?amor

si qu?eu ia·il memble
ni volva·l cap ailhor;
non ai paor
que ia selh de Pontremble
n?aia gensor
de lieis ni que la semble.

VI.

Ges non es croia
selha cui soi amis;
de sai Savoia
plus belha no·s noiris;
tals m?abelis
don ieu plus ai de ioia
non ac Paris
d?Elena, sel de Troia.

VII.

Tant per es genta
selha que·m ten ioios
las gensors trenta
vens de belhas faisos;
ben es razos
donças que mos chans senta,
quar es tan pros
e de ric pretz manenta.

VIII.

Vai t?en, chansos,
denan lieis te presenta
que s? ill no fos
no·i meir Arnautz s?ententa.

- letto 533 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/toja-12>